



An Bhruiséil, 14 Meitheamh 2018
(OR. en)

**Comhad Idirinstiúideach:
2018/0227 (COD)**

**10167/18
ADD 1**

TELECOM 189	CYBER 141
AUDIO 52	JAI 649
CULT 79	DIGIT 133
EDUC 260	DATAPROTECT 131
COMPET 457	DAPIX 194
RECH 293	FREMP 107
IND 170	RELEX 559
MI 472	CADREFIN 110
ESPACE 31	CODEC 1075

TOGRA

ó:	Ard-Rúnaí an Choimisiúin Eorpaigh, arna shíniú ag Jordi AYET PUIGARNAU, Stiúrthóir
dáta a fuarthas:	7 Meitheamh 2018
chuig:	Jeppe TRANHOLM-MIKKELSEN, Ardrúnaí Chomhairle an Aontais Eorpaigh
Uimh. an doic. ón gCoim.:	COM(2018) 434 final IARSCRÍBHINN 1 go hIARSCRÍBHINN 3
Ábhar:	IARSCRÍBHINNÍ a ghabhann leis an TOGRA LE hAGHAIDH RIALACHÁN Ó PHARLAIMINT NA hEORPA AGUS ÓN gCOMHAIRLE lena mbunaítear an clár don Eoraip Dhigiteach le haghaidh na tréimhse 2021-2027

Gheobhaidh na toscaireachtaí i gceangal leis seo doiciméad COM(2018) 434 final
IARSCRÍBHINN 1 go hIARSCRÍBHINN 3.

Faoi iamh: COM(2018) 434 final IARSCRÍBHINN 1 go hIARSCRÍBHINN 3



AN COIMISIÚN
EORPACH

An Bhruiséil, 6.6.2018
COM(2018) 434 final

ANNEXES 1 to 3

IARSCRÍBHINNÍ

a ghabhann leis an

**TOGRA LE hAGHAIDH RIALACHÁN Ó PHARLAIMINT NA hEORPA AGUS ÓN
gCOMHAIRLE**

lena mbunaítear an clár don Eoraip Dhigiteach le haghaidh na tréimhse 2021-2027

{SEC(2018) 289 final} - {SWD(2018) 305 final} - {SWD(2018) 306 final}

IARSCRÍBHINN 1 GNÍOMHAÍOCHTAÍ

Cur síos teicniúil ar an gclár: raon feidhme tosaigh na ngníomhaíochtaí

Cuirfear gníomhaíochtaí tosaigh an Chláir chun feidhme i gcomhréir leis an gcur síos teicniúil seo a leanas:

Cuspóir Sonrach 1. An Ríomhaireacht Ardfheidhmíochta

Leis an gClár, cuirfear an straitéis Eorpach maidir leis an ríomhaireacht ardfheidhmíochta chun feidhme trí thacú le héiceachóras iomlán de chuid an Aontais lena soláthraítear na hacmhainní ríomhaireachta ardfheidhmíochta agus sonraí riachtanacha chun go mbeidh an Eoraip iomaíoch ar an leibhéal domhanda. Is é is aidhm don straitéis bonneagar ríomhaireachta ardfheidhmíochta agus sonraí den chéad scoth a chur in úsáid ag a mbeidh acmhainní eacsascálaithe faoi 2022/2023, agus ag a mbeidh saoráidí iar-eacsascálaithe faoi 2026/2027, rud lena gcuirfear soláthar neamhspleách iomaíoch i dtaca le teicneolaíocht ríomhaireachta ardfheidhmíochta dá chuid féin ar fáil don Aontas, agus lena mbainfear barr feabhais amach maidir le feidhmchláir ríomhaireachta ardfheidhmíochta agus lena leathnófar infhaighteacht agus úsáid na ríomhaireachta ardfheidhmíochta.

Áireofar ar na gníomhaíochtaí tosaigh:

1. Creat comhpháirteach soláthair le haghaidh líonra comhtháite den ríomhaireacht ardfheidhmíochta den chéad scoth lena n-áirítear sár-ríomhaireacht agus bonneagar sonraí eacsascálaithe. Cuirfear ar fáil é ar bhonn neamheacnamaíoch d'úsáideoirí poiblí agus príobháideacha agus chun críocha taighde arna gcistiú ag airgead poiblí.
2. Creat comhpháirteach soláthair le haghaidh bonneagar sár-ríomhaireachta iar-eacsascálaithe, lena n-áirítear an comhtháthú le teicneolaíochtaí ríomhaireachta candamaí.
3. Comhordú ar leibhéal an Aontais agus acmhainní airgeadais leordhóthanacha chun tacú le bonneagar den chineál sin a fhorbairt, a sholáthar agus a oibriú.
4. Acmhainní ríomhaireachta ardfheidhmíochta agus sonraí na mBallstát a líonrú agus tacaíocht do na Ballstáit sin ar mian leo acmhainní ríomhaireachta ardfheidhmíochta nua a fháil nó a uasghrádú.
5. Lárionaid Inniúlachta i dtaobh na ríomhaireachta ardfheidhmíochta, ceann amháin in aghaidh an Bhallstáit agus iad bainteach lena lárionaid sár-ríomhaireachta náisiúnta, a líonrú chun seirbhísí ríomhaireachta ardfheidhmíochta a chur ar fáil don earnáil tionsclaíochta (go háirithe FBManna), domhan na hacadúlachta agus údaráis riaracháin phoiblí.
6. Teicneolaíocht atá réidh le húsáid/ata oibriochtúil a chur in úsáid: an tsár-ríomhaireacht mar sheirbhís a eascraíonn ó thaighde agus nuálaíocht chun éiceachóras ríomhaireachta ardfheidhmíochta comhtháite Eorpach a thógáil, lena gcuimsítear gach deighleog sa slabhra luacha eolaíoch agus tionsclaíoch (crua-earraí, bogearraí, feidhmchláir, seirbhísí, idirnáise agus ardscileanna digiteacha).

Cuspóir Sonrach 2. An Intleacht Shaorga

Leis an gClár, forbrófar agus neartófar croí-acmhainní na hintleachta saorga san Eoraip, lena n-áirítear acmhainní sonraí agus stórtha algartam, agus cuirfear rochtain orthu ar fáil do gach gnólacht agus údarás riaracháin phoiblí, agus déanfar saoráidí tástála agus turgnamhaíochta intleachta saorga atá ann cheana sna Ballstáit a threisiú agus a líonrú.

Áireofar ar na gníomhaíochtaí tosaigh:

1. Spásanna Coiteanna Sonraí Eorpacha a chruthú lena gcomhiomlánófar faisnéis phoiblí ar fud na hEorpa agus a bheidh ina bhfoinse ionchurtha sonraí le haghaidh réitigh intleachta saorga. Bheadh na spásanna oscailte don earnáil phoiblí agus don earnáil phríobháideach freisin. Chun an úsáid a mhéadú, ba cheart sonraí laistigh de na spásanna a bheith idir-inoibritheach a mhéid is féidir, maidir leis na hidirghníomhaíochtaí idir an earnáil phoiblí agus an earnáil phríobháideach, laistigh de na hearnálacha agus thar na hearnálacha (idir-inoibritheacht shéimeantach).
2. Leabharlanna algartam coiteanna Eorpacha a fhorbairt a bheadh rochtain ag cách orthu. Bheadh gnólachtaí agus an earnáil phoiblí in ann cibé réiteach is fearr a d'oirfeadh dá riachtanais a aithint agus a fháil.
3. Comhinfeistíocht leis na Ballstáit i láithreacha tagartha den chéad scoth chun turgnaimh agus tástálacha a dhéanamh san fhíorshaol ina ndírítear ar fheidhmeanna na hinteachta saorga in earnálacha bunriachtanacha amhail an tsláinte, faireachán an domhain agus an chomhshaoil, an tsoghluaisteacht, an tslándáil, earnáil na monaraíochta nó an airgeadais, chomh maith le réimsí eile a bhaineann le leas an phobail. Ba cheart na láithreacha a bheith ar oscailt do ghníomhaithe ar fud na hEorpa agus nasctha leis an líonra de Mhoil Nuálaíochta Digití. Ba cheart iad a fheistiú le saoráidí móra ríomhaireachta agus láimhseála sonraí, chomh maith leis na teicneolaíochtaí intleachta saorga is déanaí lena n-áirítear réimsí atá ag teacht chun cinn amhail an ríomhaireacht néaramorfach, an domhainfhoghlaim agus an róbataic.

Cuspóir Sonrach 3. An Chibearshlándaíl agus Iontaoibh

Leis an gClár, spreagfar tógáil acmhainní bunriachtanacha chun geilleagar, sochaí agus daonlathas digiteach an Aontais a áirithiú trí acmhainneacht thionsclaíoch agus iomaíochas cibearshlándaála an Aontais a threisiú, agus trí acmhainní na hearnála poiblí agus na hearnála príobháidí araon a fheabhsú chun saoránaigh agus gnólachtaí Eorpacha a chosaint ar chibearbhagairtí, lena n-áirítear tacaíocht don Treoir maidir le Slándáil Líonra agus Faisnéise a chur chun feidhme.

Áireofar ar na gníomhaíochtaí tosaigh faoin gcuspóir seo:

1. Comhinfeistíocht leis na Ballstáit in ardtrealamh, ard-bhonneagair sonraí agus ardfhios gnó cibearshlándaála atá riachtanach chun bonneagair bharrthábhachtacha agus an Margadh Aonair Digiteach trí cheile a chosaint. D'fhéadfaí a áireamh leis sin infheistíochtaí i saoráidí candamacha agus acmhainní sonraí le haghaidh na cibearshlándaála, feachtas staidéir sa chibearspás, chomh maith le huirlisí eile atá le cur ar fáil don earnáil phoiblí agus don earnáil phríobháideach ar fud na hEorpa.
2. Na hacmhainní teicneolaíochta atá ann cheana a mhéadú agus na lárionaid inniúlachta sna Ballstáit a líonrú, agus a áirithiú go mbeidh na hacmhainní sin ag freastal ar riachtanais na hearnála poiblí agus na hearnála tionsclaíochta, lena

n-áirítear i dtáirgí agus seirbhísí lena dtreisiú an chibearshlándaíl agus iontaoibh laistigh den Mhargadh Aonair Digiteach.

3. A áirithiú go gcuirfear na réitigh chibearshlándaíla agus iontaoibhe is déanaí in úsáid go forleathan ar fud na mBallstát. Áirítear air sin slándaíl agus sábháilteacht trí dhearadh le haghaidh táirgí.
4. Tacaíocht chun an bhearna scileanna cibearshlándaíla a dhúnadh, e.g. trí chlár scileanna cibearshlándaíla a ailíniú, trí na cláir sin a oiriúnú do riachtanais earnálacha ar leith agus trí rochtain ar chúrsaí oiliúna speisialaithe spriocdhírthe a éascú.

Cuspóir Sonrach 4. Ardscileanna Digiteacha

Leis an gClár seo, tacófar le rochtain éasca ar ardscileanna digiteacha, go háirithe sa ríomhaireacht ardfheidhmíochta, an intleacht shaorga, mórleabhair dháilte (e.g. blocshlabhra) agus cibearshlándaíl don lucht saothair reatha agus don lucht saothair amach anseo trí na modhanna chun na scileanna sin a fháil agus a fhorbairt a chur ar fáil do dhaltaí, céimithe nua agus oibrithre reatha, beag beann ar an áit a bhfuil siad suite.

Áireofar ar na gníomhaíochtaí tosaigh:

1. Rochtain ar oiliúint ar an láthair oibre trí pháirt a ghlacadh i socrúcháin oibre i lárionaid inniúlachta agus i ngnólachtaí a chuireann ardteicneolaíochtaí in úsáid.
2. Rochtain ar chúrsaí in ardteicneolaíochtaí digiteacha a gcuirfidh ollscoileanna ar fáil iad i gcomhar leis na comhlachtaí atá bainteach leis an gClár (áireofar ar na hábhair an intleacht shaorga, an chibearshlándaíl, mórleabhair dháilte (e.g. blocshlabhra), an ríomhaireacht ardfheidhmíochta agus teicneolaíochtaí candamacha).
3. Rannpháirtíocht i gcúrsaí oiliúna gairmiúla speisialaithe gearrthéarma a bheidh deimhnithe roimh ré, mar shampla i réimse na cibearshlándaíla.

Le hidirghabhálacha, díreofar ar scileanna digiteacha ardleibhéal a bhaineann le teicneolaíochtaí sonracha.

Is trí na Moil Nuálaíochta Digití go príomha a cheapfar agus a chuirfear chun feidhme gach idirghabháil, mar a shainmhínítear in Airteagal 15.

Cuspóir Sonrach 5. Cur in úsáid, úsáid is fearr na n-acmhainní digiteacha agus Idir-inoibritheacht

I. Áireofar ar na gníomhaíochtaí tosaigh maidir le claochlú digiteach na réimsí a bhaineann le leas an phobail:

Tionscadail leasa choitinn a bheidh i dtionscadail lena bhfreastalófar ar chur in úsáid nó úsáid is fearr na n-acmhainní digiteacha nó ar an idir-inoibritheacht.

1. Údaráis riaracháin a nuachóiriú:

- 1.1. Tacú leis na Ballstáit i gcur chun feidhme Phrionsabail Dhearbhuí Thailinn maidir leis an ríomhrialtas i gach réimse beartais, lena gcruthófar, i gcás inar gá, na clárlanna is gá agus lena ndéanfar iad a idirnascadh, agus an Rialachán Ginearálta maidir le Cosaint Sonraí á urramú go hiomlán.
- 1.2. Tacú le héiceachóras comhleanúnach de bhonneagar seirbhísí digiteacha trasteorann a cheapadh, a úsáid ar bhonn píolótach, a chur in úsáid, a chur chun cinn agus cothabháil a dhéanamh air, agus éascaíocht a dhéanamh ar réitigh thrasteorann, idir-

inoibritheacha, ilteangacha, shábháilte gan uaim ó cheann go ceann nó ar réitigh thrasearnála agus ar chreataí comhchoiteanna laistigh den riarachán poiblí. Áireofar leis freisin modheolaíochtaí chun an tionchar agus na tairbhí a mheasúnú.

- 1.3. Tacú leis na sonraíochtaí agus caighdeáin chomhchoiteanna atá ann cheana a mheasúnú, a nuashonrú agus a chur chun cinn, chomh maith le sonraíochtaí comhchoiteanna nua, sonraíochtaí oscailte nua agus caighdeáin nua a fhorbairt, a bhunú agus a chur chun cinn trí bhíthin ardáin chaighdeánaithe an Aontais agus i gcomhar le heagraíochtaí caighdeánaithe Eorpacha nó idirnáisiúnta de réir mar is iomchuí.
- 1.4. Dul i gcomhar chun éiceachóras Eorpach a chur ar bun le haghaidh bonneagair iontaofa ina n-úsáidtear seirbhísí agus feidhmchláir mórleabhar dáilte (e.g. blocshlabhra), lena n-áirítear tacaíocht don idir-inoibritheacht agus don chaighdeánú, agus cur in úsáid fheidhmchláir thrasteorann an Aontais a chothú.

2. *Sláinte*¹

- 2.1. A áirithiú gur féidir le saoránaigh an Aontais a sonraí pearsanta sláinte a rochtain, a roinnt, a úsáid agus a bhainistiú go slán thar theorainneacha, beag beann ar an áit a bhfuil siad nó ar an áit a bhfuil na sonraí. An Bonneagar Eorpach um Sheirbhís Dhigiteach na ríomhShláinte a chur i gcrích agus cur leis i bhfoirm seirbhísí digiteacha nua, agus tacú le cur in úsáid na formáide malartaithe Eorpaí le haghaidh ríomhthairfid sláinte.
 - 2.2. Sonraí níos fearr a chur ar fáil le haghaidh taighde, galair a chosc agus sláinte agus cúram sláinte pearsantaithe. A áirithiú go mbeidh rochtain ag taighdeoirí sláinte agus cleachtóirí cliniciúla Eorpacha ar an scála acmhainní is gá (spásanna sonraí, saineolas agus acmhainní anailíseacha coiteanna) ionas go mbeidh siad in ann fionnachtana a dhéanamh maidir le galair choitianta agus neamhchoitianta. Is é an sprioc atá ann cohórt daonra-bhunaithe ina bhfuil 10 milliún saoránach ar a laghad a áirithiú. Garsprioc atá ann go mbeidh 1 mhilliún géanóim seicheamhaithe faoi 2022.
 - 2.3. Uirlisí digiteacha a chur ar fáil chun saoránaigh a chumhachtú agus ar mhaithe le cúram daonlárnach trí thacú le malartú na gcleachtas nuálach agus na gcleachtas is fearr sa tsláinte dhigiteach, fothú acmhainneachta agus cúnaimh teicniúil, go háirithe le haghaidh na cibearshláindála, na hintleachta saorga agus na ríomhaireachta ardfheidhmíochta.
3. *Na breithiúna*: Cumarsáid leictreonach trasteorann shlán gan uaim a chumasú laistigh de na breithiúna agus idir na breithiúna agus comhlachtaí inniúla eile i réimse an cheartais shibhialta agus choiriúil. Feabhas a chur ar an rochtain atá ag saoránaigh, gnólachtaí, cleachtóirí dlí agus breithiúna ar an gceartas agus ar fhaisnéis dhlíthiúla agus ar nósanna imeachta dlíthiúla trí idirnaisc atá idir-inoibritheach ar bhonn séimeantach le bunachair sonraí agus cláir náisiúnta, chomh maith le héascaíocht a dhéanamh ar dhíospóidí a réiteach lasmuigh den chúirt ar líne. Forbairt agus cur chun feidhme teicneolaíochtaí nuálacha a chur chun cinn le haghaidh cleachtóirí cúirteanna agus dlí atá bunaithe ar réitigh intleachta saorga ar dócha go gcuíchoireofar agus go mbrostófar leo nósanna imeachta (mar shampla feidhmchláir “teicneolaíochta dlí”).

¹ COM(2018) 233 final, maidir le claochlú digiteach na sláinte agus an chúraim sláinte sa Mhargadh Aonair Digiteach a chumasú; saoránaigh a chumhachtú agus sochaí níos folláine a thógáil

4. *Iompar, fuinneamh agus comhshaol*: Réitigh agus bonneagair dhíláráithe atá ag teastáil le haghaidh feidhmeanna digiteacha ar mhórsála amhail cathracha cliste nó ceantair thuaithe chliste a chur in úsáid chun tacú le beartais iompair, fuinnimh agus chomhshaoil.
5. *Oideachas agus cultúr*: Rochtain ar na teicneolaíochtaí digiteacha is déanaí, ón intleacht shaorga go dtí an ardríomhaireacht, a chur ar fáil do chruthaitheoirí agus don tionscal cruthaitheachta san Eoraip. Tairbhe a bhaint as oidhreacht chultúrtha na hEorpa mar mhodh chun an éagsúlacht chultúrtha, an comhtháthú sóisialta agus an tsaoránacht Eorpach a chur chun cinn. Tacú le glacadh teicneolaíochtaí digiteacha san oideachas.

Leis na Moil Nuálaíochta Digití, féadfar tacú go páirteach leis na gníomhaíochtaí ar fad thuasluaite trí bhíthin na n-acmhainní céanna a forbraíodh chun cabhrú le claochlú digiteach na hearnála tionsclaíochta (féach pointe II).

Sa bhreis air sin, tacófar le tacar gníomhaíochtaí tacaíochta don Mhargadh Aonair Digiteach ina n-áireofar líonra uile-Eorpach d'Ionaid d'Idirlíon Níos Sábháilte chun an litearthacht dhigiteach a chothú agus feasacht a ardú i measc mionaoiseach, tuismitheoirí agus múinteoirí faoi na rioscaí a d'fhéadfadh a bheith ann do mhionaoisigh ar líne agus faoi na bealaí chun iad a chosaint, agus chun dul i ngleic le scaipeadh ábhar pornagrafaíochta leanaí ar líne; bearta arb é is aidhm dóibh dul i ngleic leis an mbréagaisnéis arna scaipeadh d'aon ghnó; Faireachlann de chuid an Aontais le haghaidh an gheilleagair ardáin dhigitigh chomh maith le staidéir agus gníomhaíochtaí for-rochtana.

II. Gníomhaíochtaí tosaigh a bhaineann le digití na hearnála tionsclaíochta:

1. Rannchuidiú le méadú an bhonneagair agus na saoráidí teicneolaíochta (trealamh, bogearraí agus uirlisí) i líonra na Mol Nuálaíochta Digití chun a áirithiú go mbeidh rochtain ar acmhainní digiteacha ag gach gnólacht, go háirithe FBManna i ngach réigiún ar fud an Aontais. Áirítear leis sin go háirithe:
 - 1.1. Rochtain ar spásanna Coiteanna Sonraí Eorpacha, ar ardáin intleachta saorga agus ar shaoráidí ríomhaireachta ardfheidhmíochta Eorpacha ar mhaithe le hanailísíocht sonraí agus feidhmchláir dhiana a ríomh
 - 1.2. Rochtain ar shaoráidí tástála ar mhórsála le haghaidh na hintleachta saorga agus ar arduirlisí cibearsíandála
 - 1.3. Rochtain ar ardsíleanna
2. Bearta nuálaíochta i dteicneolaíochtaí digiteacha a fhaigheann tacaíocht go háirithe faoin gClár Fís Eorpach agus infheistíochtaí i Moil Nuálaíochta Digití a fhaigheann tacaíocht faoi Chistí Forbraíochta Réigiúnaí na hEorpa, déanfar iad a chomhordú agus a chomhlánú le gníomhaíochtaí. Féadfar deontais le haghaidh mhacasamhlú an mhargaidh a sholáthar ón gClár don Eoraip Dhigiteach i gcomhréir le rialacha maidir le státchabhair. Is le hionstraimí airgeadais lena mbaintear leas as an scéim InvestEU a thacófar le rochtain a sholáthar ar mhaoiniú le haghaidh céimeanna breise i gclaochlú digiteach na tionsclaíochta.

IARSCRÍBHINN 2

Táscairí feidhmíochta

Cuspóir Sonrach 1 - An ríomhaireacht ardfheidhmíochta

1.1 Líon na mbonneagar ríomhaireachta ardfheidhmíochta arna soláthar go comhpháirteach

1.2 Úsáid na ríomhairí eacsascálaithe agus iar-eacsascálaithe ina hiomláine agus ag grúpaí páirtithe leasmhara éagsúla (ollscoileanna, FBManna etc.)

Cuspóir Sonrach 2 - An intleacht shaorga

2.1 An méid iomlán arna chomhinfeistiú i láithreacha turgnamhaíochta agus tástála

2.2 Líon na ngnólachtaí agus na n-eagraíochtaí a úsáideann an intleacht shaorga

Cuspóir Sonrach 3 - An cibearshlándáil agus iontaoibh

3.1 Líon na mbonneagar cibearshlándála agus/nó na n-uirlisí cibearshlándála arna soláthar go comhpháirteach

3.2 Líon na n-úsáideoirí agus na bpobal úsáideoirí ag a bhfuil rochtain ar shaoráidí cibearshlándála Eorpacha

Cuspóir Sonrach 4 - Ardscileanna digiteacha

4.1 Líon na speisialtóirí TFC a oileadh agus atá ag obair

4.2 Líon na bhfiontar ag a bhfuil deacrachtaí speisialtóirí TFC a earcú

Cuspóir Sonrach 5 - Cur in úsáid, úsáid is fearr na n-acmhainní digiteacha agus idir-inoibritheacht

5.1 Glacadh na seirbhísí poiblí digiteacha

5.2 Fiontair ag a bhfuil scór ard déine digítí

5.3 Ailíniú an Chreata Idir-Inoibritheachta Náisiúnta leis an gCreat Idir-Inoibritheachta Eorpach

IARSCRÍBHINN 3

Sineirgíochtaí le cláir eile de chuid an Aontais

3. Le sineirgíochtaí le Fís Eorpach, áiritheofar na nithe seo a leanas:
- (a) cé go dtagann roinnt réimsí téamacha a dtugtar aghaidh orthu leis an gClár don Eoraip Dhigiteach agus le Fís Eorpach le chéile, go mbeidh na cineálacha beart atá le maoiniú, a n-aschuir ionchasacha agus a loighic idirghabhála, éagsúil agus comhlántach;
 - (b) go soláthrófar le Fís Eorpach tacaíocht chuimsitheach don taighde, an fhorbairt theicneolaíoch, an taispeáint, an píolótú, an cruthúnas coincheapa, an tástáil agus an nuálaíocht, lena n-áirítear cur in úsáid réamhthráchtálach teicneolaíochtaí digiteacha nuálacha, go háirithe le (i) buiséad ar leith i gcolún na nDúshlán Domhanda a bhaineann leis an “Earnáil Dhigiteach agus Tionsclaíochta” chun teicneolaíochtaí cumasúcháin a fhorbairt (an Intleacht Shaorga agus an Róbataic, an Chéad Ghlúin Eile den Idirlíon, an Ríomhaireacht Ardfheidhmíochta agus Olltíomsú Sonraí, Eochairtheicneolaíochtaí Digiteacha, lena gcomhcheanglaítear an ghné dhigiteach le teicneolaíochtaí eile); (ii) tacaíocht do ríomh-bhonneagair faoin gcolún “Eolaíocht Oscailte”; (iii) comhtháthú digiteach thar na Dúshláin Dhomhanda ar fad (sláinte, slándáil, fuinneamh agus soghluaisteacht, aeráid, etc.); agus (iv) tacaíocht do nuálaíochtaí ceannródaíochta atá i mbun fáis faoin gcolún “Nuálaíocht Oscailte” (a mbeidh teicneolaíochta digiteacha agus fisiceacha cónasctha i gcuid mhór acu);
 - (c) go ndéanfar infheistíocht leis an gClár don Eoraip Dhigiteach (i) i bhfothú acmhainneachta digítí i dtaca leis an Ríomhaireacht Ardfheidhmíochta, an Intleacht Shaorga, an Chibearshlándaíl agus ardscileanna digiteacha; agus (ii) i gcur in úsáid náisiúnta agus réigiúnach laistigh de chreat de chuid an Aontais maidir le hacmhainní digiteacha agus na teicneolaíochtaí digiteacha is déanaí i réimsí a bhaineann le leas an phobail (amhail an tsláinte, an riarachán poiblí, an ceartas agus an t-oideachas) nó le cliseadh margaidh (amhail digitiú gnólachtaí, go háirithe frontair bheaga agus mheánmhéide);
 - (d) go gcuirfear acmhainní agus bonneagair de chuid an Chláir don Eoraip Dhigiteach ar fáil don lucht taighde agus nuálaíochta, lena n-áirítear le haghaidh gníomhaíochtaí a fhaigheann tacaíocht ó Fhís Eorpach, agus tástáil, turgnamhaíocht agus taispeáint thar gach earnáil agus disciplín san áireamh;
 - (e) de réir mar a théann forbairt na dteicneolaíochtaí digiteacha nuálacha in aibíocht le Fís Eorpach, go nglacfar iad agus go gcuirfear in úsáid iad de réir a chéile faoin gClár don Eoraip Dhigiteach;
 - (f) maidir le tionscnaimh faoi Fhís Eorpach le haghaidh forbairt scileanna agus curaclaim inniúlachtaí, lena n-áirítear iad sin arna soláthar ag ionaid chomhlonnaithe Phobal Eolais agus Nuálaíochta-Digiteach de chuid na hInstitiúide Eorpaí um Nuálaíocht agus Teicneolaíocht, go ndéanfar iad a chomhlánú le fothú acmhainneachta in ardscileanna digiteacha arna maoiniú faoin gClár don Eoraip Dhigiteach;
 - (g) go gcuirfear ar bun sásraí comhordaithe láidre le haghaidh clársceidealaithe agus cur chun feidhme, agus na nósanna imeachta ar fad don dá chlár á n-ailíniú a mhéid is

féidir. Beidh gach seirbhís a bhaineann leis an gCoimisiún páirteach ina struchtúir rialachais.

4. Le sineirgíochtaí le cláir faoi bhainistíocht chomhroinnte de chuid an Aontais, lena n-áirítear Ciste Forbraíochta Réigiúnaí na hEorpa (CFRE), Ciste Sóisialta na hEorpa Plus (CSE+), an Ciste Eorpach Talmhaíochta um Fhorbairt Tuaithe (CETFT) agus an Ciste Eorpach Muirí agus Iascaigh (CEMI), áiríteofar an méid seo a leanas:
 - (a) go n-úsáidfeadh socruithe le haghaidh cistiú comhlántach ó chláir faoi bhainistíocht chomhroinnte de chuid an Aontais agus ón gClár don Eoraip Dhigiteach chun tacú le gníomhaíochtaí lena ndéantar naisc idir speisialtóireachtaí cliste agus chun tacú le claochlú digiteach gheilleagar na hEorpa.
 - (b) go gcuirfeadh, le CFRE, le forbairt agus neartú na n-éiceachóras nuálaíochta réigiúnach agus áitiúil agus leis an gclaochlú tionsclaíoch. Áirítear leis sin tacaíocht do dhigitiú na hearnála tionsclaíochta agus bailiú torthaí, chomh maith le teicneolaíochtaí agus réitigh nuálacha a chur i bhfeidhm. Leis an gClár don Eoraip Dhigiteach, comhlánófar líonrú agus mapáil thrasnáisiúnta na n-acmhainní digiteacha, agus tacófar leo, ionas go mbeidh rochtain ag FBManna orthu agus ionas go mbeidh rochtain ar réitigh idir-inoibritheacha teicneolaíochta faisnéise i ngach réigiún de chuid an Aontais.
5. Le sineirgíochtaí leis an tSaoráid um Chónascadh na hEorpa (SCE), áireofar an méid seo a leanas:
 - (a) go ndéanfaid, leis an gClár nua don Eoraip Dhigiteach, ar acmhainní agus bonneagar digiteach ar mhórscaála a fhothú sa Ríomhaireacht Ardfheidhmíochta, an Intleacht Shaorga, an Chibearshlándaíl agus in ardscaileanna digiteacha ionas go mbeidh glacadh agus cur in úsáid forleathan ann ar fud na hEorpa i dtaca le réitigh dhigiteacha nuálacha bharrthábhachtacha, atá ann cheana nó a ndéanadh tástáil orthu, laistigh de chreat an Aontais i réimsí a bhaineann le leas an phobail nó cliseadh margaidh. Cuirfeadh an Clár don Eoraip Dhigiteach chun feidhme go príomha trí infheistíochtaí comhordaithe agus straitéiseacha leis na Ballstáit, go háirithe trí sholáthar poiblí comhpháirteach, in acmhainní digiteacha atá le roinnt ar fud na hEorpa agus i mbearta uile-Aontais lena dtacaítear le hidir-inoibritheacht agus le caighdeánú mar chuid den phróiseas chun Margadh Aonair Digiteach a fhorbairt.
 - (b) go gcuirfeadh acmhainní agus bonneagair an Chláir don Eoraip Dhigiteach ar fáil chun teicneolaíochtaí agus réitigh nuálacha úra i réimse na soghluaisteachta agus an iompair a chur in úsáid. Tacófar, le SCE, le teicneolaíochtaí agus réitigh nuálacha úra i réimse na soghluaisteachta agus an iompair a chur in úsáid agus a chur i bhfeidhm.
 - (c) go mbunófar sásraí comhordaithe, go háirithe trí na struchtúir rialachais iomchuí.
6. Le sineirgíochtaí le InvestEU, áiríteofar na nithe seo a leanas:
 - (a) gur faoin Rialachán maidir leis an gCiste InvestEU a sholáthrófar tacaíocht trí mhaoiniú margadh-bhunaithe, lena n-áirítear cuspóirí beartais faoin gClár seo a ghnóthú. Féadfaid maoiniú margadh-bhunaithe den chineál sin a chomhcheangal leis an tacaíocht ó dheontais.
 - (b) gur leis an tacaíocht a fhaightear ó na Moil Nuálaíochta Digití a éascófar rochtain gnólachtaí ar ionstraim airgeadais.

7. Le sineirgíochtaí le Erasmus, áiritheofar na nithe seo a leanas:
- (a) go dtacófar leis an gClár forbairt agus éadáil na n-ardscileanna digiteacha is gá chun teicneolaíochtaí ceannródaíocha amhail an intleacht shaorga nó an ríomhaireacht ardfheidhmíochta a chur in úsáid, i gcomhar le tionscail ábhartha.
 - (b) go gcomhlánófar leis an gcuid de Erasmus a bhaineann le hardscileanna digiteacha na hidirghabhálacha ón gClár don Eoraip Dhigiteach lena ndírítear ar éadáil scileanna i ngach réimse agus ar gach leibhéal, trí eispéiris soghluaisteachta.